

# **PUNGGAN ANG PAG-IGRAB SANG IMPERYALISTA NGA GYERA SA TUNGA SANG US KAG CHINA!**

## **PANGAPINAN ANG SOBERANYA SANG PILIPINAS!**



Ginpagwa sang  
Armando Sumayang Jr Command -  
New People's Army  
Southwest Negros Guerrilla Front  
Mayo 2024

## ***1.) Ano ang kapuslanan sang Balikatan kag iban pa nga wargames subong nga 2024?***

Ang Balikatan 2024 ang isa lang sa masobra 500 ka wargames kag iban pa nga aktibidad militar nga plano ilunsar sang US sa Pilipinas subong nga tuig. Indi pa lakip diri ang unilateral kag mas masangkad nga wargames nga ginalunsar sang US, naga-isahanon ukon upod ang iban sini nga alyado sa Asya, sa sulod ukon malapit sa teritoryo nga kadagatan sang Pilipinas.

Magapokus ini sa mga "yabi nga lokasyon" sa nakatungdan nga bahin sa Palawan, isa ka lugar nga madamo ang presensya sang mga barko sang China. Gamit ang reaksyonaryo nga AFP, ginahanda sang US ang Pilipinas para sa ginasulsulan niya nga gyera sa China.

## ***2.) Ngaa nagaluntad ang mga Balikatan exercises kag mga wargames sa Pilipinas?***

Malawig na nga mala-kolonya sang US ang Pilipinas. Buot silingon, indi matuod nga isa ka hilway nga pungsod ang Pilipinas bangud sa mga kasugtanan nga nagtugot sa US nga hilway nga maghimulos sa manggad sang pungsod kag magkontrol sa pulitika kag patag militar sini.

Ginpirmahan sang reaksyonaryo nga gobyerno sang Pilipinas kag US ang 1951 Mutual Defense Treaty (MDT), 1998 Visiting Forces Agreement (VFA), 2014 Enhanced Defense Cooperation Agreement (EDCA), kag 2023 Bilateral Defense Guidelines (BDG) nga naghimo nga imbakan sang armas kag gamit nukleyar ang Pilipinas, pagtukod sang mga base militar sang US kag paghigot sa Pilipinas sa patakaran pangluwas sang US. Sa "giya" nga ginhandang sang US, gintalana sini ang pagpondo, paghanas kag pag-armas sa AFP para paalagaron ang papet nga hukbo sa mga katuyuan sini batuk sa China.

### ***3.) Ano ang mga ugat sang banggianay militar sang US kag China?***

Banggianay pang-ekonomiya ang ugat sang banggianay militar sang US kag China, nga nagsugod singki sadtong tunga-tunga sang dekada 2000. Antes pa sini, madugay na nga nangin magkatimbang sa ekonomya ang US kag China. Halin sa katapusan sang dekada 1970, ginsuportahan sang US ang padayon nga transpormasyon sang China halin sa pagka-sosyalista padulong sa pagka-kapitalista. Sang nangin bag-o nga usbong nga kapitalista nga pungsod ang China, nahimo ini nga karibal sang US sa pagdominar sini sa bilog nga kalibutan.

Pila ka beses nga ginpabaskog sang China ang iya nga pwersa militar kag ang mga operasyon sini sa luwas sang pungsod. Kabahin diri ang

pagtukod sang mga base militar sa pito ka artipisyal nga isla sa South China Sea kag sa sulod sang teritoryo pangdagat sang Pilipinas, agud kontrolon ang ruta pangbaligya-anay diri. Ang pagtukod sang mga base militar nga ini ang direkta nga agresyon militar kag lapas sa kinamatarung pangdagat sang Pilipinas nga ginkilala sa desisyon sang International Arbitral Tribunal sa idalom sang United Nations Convention on the Laws of the Seas (UNCLOS).

## ***4.) Matabo ayhan ang imperyalista nga gyera sa tunga sang US kag China?***

Sa pagpanghangkat sang US sang away sa China, nagadako ang posibilidad sa pag-igrab sang gyera. Magadala ini sang dako nga pamahug sa kabuhi sang mga Pilipino, kag kahilwayan sang pungsod, amo man sa kabuhi kag kahilwayan sang nagkalain-lain nga pungsod sa bilog nga kalibutan.

Kon ini mag-igrab, indi mahimo nga makalikaw ang Pilipinas sa balos atake sang China. Pareho sang padayon nga paggatong sang US sa gyera sang Ukraine kag Russia, gamiton sang US ang Pilipinas bilang proxy (ukon mangin tiglawas sang US) sang iya gintuga nga gyera. Ginapanginpuslan man ang ini nga sitwasyon sang pinakadalagko nga kumpanya sang militar sang US nga nagakandos sang binilyon ka dolyar nga ganansya sa pagbaligya kag pagpautang sang armas.

## ***5.) Ngaa pamahug sa kabuhi kag kahilwayan sang mga Negrosanon kag sa bilog pumuluyong Pilipino ang pagpanulsul sang US sang gyera sa Asya?***

Ang pagtukod sang mga base militar sang US bilang kabahin sang pagpangaman sa "teatro sang gyera" sang US kontra China ang direkta nga paglapas sa kinamatarung sang Pilipinas sa pagbuot-sa-kaugalingon. Ang paggamit sang US sa AFP bilang suportang pwersa sa mapang-away nga agresyon ang ilabi nga nagalapak sa kahilwayan sang pungsod kag kinamatarung sang mga Pilipino nga mag-angkon sang nagakinaugalingon nga patakaran pangluwas. Ang posibilidad nga gamiton sang US ang mga pasilidad sini sa Pilipinas para magpalupad sang misayl, ilunsar ang mga jetfighter, ukon serbisyuhan ang mga barko pang-gyera sini, ang indi malayo nga gamiton nga rason para targeton ang pungsod sang balos nga atake sang China.

Ang pagka sunud-sunuran sang rehimen Marcos sa mga mando sang US kag pagtraidor sa kahilwayan sang Pilipinas ang kabangdanan nga ang pungsod ang nagakadalahig sa gyera nga wala labot sa iya pungsodnon nga interes. Kabaylo sang ayuda militar, pampolitika kag ekonomiya nga pabor, bulag nga ginasunod sang rehimen Marcos ang kagustohan kag kinahanglanon sang militar kag ekonomiya sang US para sa pagtukod sang mga base kag pasilidad. Partikular diri sa Sur sang Negros, kasugpon man ini sa pagpasulod kag pagpangapin sang mga

dumuluong nga kompanya sang mina, reklamasyon kag demolisyon sa higad sang baybay, palm oil plantation, mga makahakalit nga dam kag mga green energy nga planta diri sa isla sang Negros nga nagresulta sa pagpang-agaw sang duta sang mga mangunguma kag pagkadula sang palangabuhian sang mga mangingisda kag puluy-an sang mga Negrosanon. Sa pihak nga bahin, pareho sang rehimen Duterte, wala man sang taludtod ang rehimen Marcos sa atubang sang direkta nga paglapas sang China sa teritoryo pangdagat sang Piliipinas sa pagpatindog sang mga base militar, kag pagkamol sang China sa manggad sa kadagatan sang Pilipinas. Ang pagpamigos nga ini sang China sa Pilipinas, ilabi na sa mga mangingisdang Pilipino, ang gingamit subong sang US nga publisidad para hatagan rason kag kuhaon ang simpatiya sang mga Pilipino sa ginahimo sini nga pagpabaskog sang presensya militar sa South China Sea.

***6.) Ano ang mga katungdanan sang rebolusyonaryong kahublagaan sa pagbato kag pagpugong sa imperyalista nga gyera sa tunga sang US kag China, kag iban pa nga mga imperyalistang gyera sa kalibutan?***

Katungdanan sang rebolusyonyong kahublagan nga isahon ang pumuluyong Pilipino sa idalom sang bandera sang patriyotismo kag pahulagon ang pumuluyo para magtindog, manindugan kag pangapinan ang kabuhi kag kahilwayan sang pungsod. Ibun-ag ang gamhanan nga kahublagan anti-imperyalista kag batuk sa mga imperyalistang gyera. Kon indi, mahimo nga lubos mahigop ang pungsod sa alimpuros sang inter-imperyalista nga gyera kag magasulod ang pungsod sa panibag-o nga hugna sang pungsodnon nga pag-antus.

Dapat ipakigbato sang pumuluyo ang hinanali nga makipungsodnon nga demanda sang pagbasura sa MDT, EDCA, VFA, BDG kag tanan nga indi alalangay nga kasugtanan militar sa US. Kinahanglan mag-isa ang tanan para batuan ang plano nga pagtukod sang mga bag-o nga base militar kag pasilidad sa Pilipinas kag gub-on ang nagaluntad na nga base militar kag pasilidad sang US sa Pilipinas kag palayason ang tanan nga tropang Amerikano sa Pilipinas. Dapat nila ipauntat ang paglunsar sang Balikatan, iban pa nga mapanghangkat nga wargames kag iban pa nga mapasilabot nga aktibidad militar.

Dapat pamatukan kag batuan ang padayon nga militarisasyon sang China sa West Philippine Sea kag isulong ang pagbungkag sa tanan nga base militar kag pasilidad sang China nga yara sa West Philippine Sea.

Mahinungdanon nga kontribusyon sang Partido, sang Bagong Hukbong Bayan kag sang bug-os nga rebolusyonyong kahublagan batuk sa inter-imperyalista nga gyera ang pagsulong sang demokratiko nga rebolusyon sang banwa paagi sa pangmalawigon nga inaway banwa

kag iban pa nga porma sang pagpahulag sa malapad nga masang Pilipino. Ang armado nga rebolusyon sa Pilipinas ang nagaserbe nga pinakadako nga sablag sa mga plano sang US nga magsugod kag magpadilaab sang armado nga banggianay sa Asia.

Determinado naman ang BHB nga magpabaskog kag ilunsar ang nagadamo nga mga taktikal nga opensiba, nga krusyal nga sangkap para pungan ang iskema sang US nga pasaglabon ang inter-imperyalista nga inaway. Pabaskugon ang rekrutment sang BHB kag tipunon ang malapad nga suporta sang patriyotiko nga kahublagan para sa rebolusyonyong armadong paghimakas.

**PAMATUKAN ANG PAGPASILABOT MILITAR  
SANG US!**

**PAMATUKAN ANG PAGPANGHANGKAT  
SANG US SANG GYERA SA CHINA! US KAG  
CHINA, LAYAS SA PINAS!**

**IBASURA ANG MDT, EDCA, VFA KAG BDG!**